

აჭარის ავტონომიური რესპუბლიკის უმაღლესი  
საარჩევნო კომისიის

დ ა დ გ ე ნ ი ლ ე ბ ა № 33

14 ივნისი 2004 წ.

ქ. ბათუმი

აჭარის ავტონომიური რესპუბლიკის უმაღლესი საბჭოს არჩევნებისათვის  
კენჭისყრისა დღისა და კენჭისყრის/არჩევნების შედეგების შეჯამებასთან  
დაკავშირებული ზოგიერთი პროცედურის განსაზღვრის თაობაზე

„აჭარის ავტონომიური რესპუბლიკის უმაღლესი საბჭოს არჩევნების შესახებ“  
აჭარის ავტონომიური რესპუბლიკის კანონის 45-ე მუხლის პირველი პუნქტის  
„გ“ ქვეპუნქტისა და მე-3 პუნქტის საფუძველზე, აჭარის ავტონომიური  
რესპუბლიკის უმაღლესი საარჩევნო კომისია ადგენს:

**მუხლი 1.** საუბნო და საოლქო საარჩევნო კომისიების კენჭისყრის და  
არჩევნების შედეგების შემაჯამებელი ოქმები:

თითოეული სახის შემაჯამებელი ოქმი (საუბნო საარჩევნო კომისიის  
კენჭისყრის შედეგების შემაჯამებელი ოქმები და საოლქო საარჩევნო კომისიის  
კენჭისყრისა და არჩევნების შედეგების შემაჯამებელი ოქმები) იკინძება  
ბლოკნოტების სახით. ბლოკნოტები, ცალ-ცალკე თითოეული სახის ოქმისათვის,  
თანამიმდევრობით ინომრება დაწყებული 00001-დან საუბნო საარჩევნო კომისიის  
ოქმებისათვის და 001-დან საოლქო საარჩევნო კომისიის ოქმებისათვის. საკუთრივ  
ოქმი მისი ყუისაგან პერფორირებული ხაზითაა გამოყოფილი. ბლოკნოტს აქვს  
ყდა, რომლის თავფურცელზეც დაბეჭდილია არჩევნების დასახელება, საერთო  
არჩევნების გამართვის წელი, ოქმების სახეობა, ბლოკნოტის ნომერი, გრაფები:  
საარჩევნო ოლქის ნომრისა და დასახელების, საარჩევნო უბნის ნომრის, საოლქო  
და საუბნო საარჩევნო კომისიების მიერ ბლოკნოტის მიღების თარიღის  
აღნიშვნისა და ბლოკნოტის გამცემი და მიმღები უფლებამოსილი პირების  
ხელმოწერებისათვის. ყდის უკანა ფურცელი წარმოადგენს საუბნო/საოლქო  
საარჩევნო კომისიის კუთვნილ შემაჯამებელ ოქმს. საუბნო საარჩევნო კომისიის  
კუთვნილი შემაჯამებელი ოქმი (ყდის უკანა ფურცელი) ყდის თავფურცელთან,  
სადემონსტრაციო ოქმთან და საარჩევნო კომისიის სხვა საბუთებთან ერთად  
ილუქება საარჩევნო უბანში კენჭისყრის შედეგების შეჯამების შემდეგ და  
გადაეცემა ზემდგომ საოლქო საარჩევნო კომისიას.

**მუხლი 2.** საოლქო და საუბნო საარჩევნო კომისიების კენჭისყრის შედეგების  
თითოეული სახის შემაჯამებელი ოქმები აკინძულია ბლოკნოტებად, რომლებიც

შედგება თავფურცელისაგან, №01-დან №10-მდე თანამიმდევრულად დანომრილი 10 ფურცლისაგან, და ასევე საარჩევნო კომისიის კუთვნილი (ყდის უკანა ფურცელი) ოქმისაგან.

**მუხლი 3.** საუბნო საარჩევნო კომისიის კენჭისყრის შედეგების შემაჯამებელ ოქმში აღინიშნება:

- ა) საარჩევნო ოლქის ნომერი და დასახელება, საარჩევნო უბნის ნომერი;
- ბ) არჩევნების დასახელება;
- გ) კენჭისყრის თარიღი (თუ ეს არის განმეორებითი კენჭისყრა ან არჩევნების მეორე ტური, ესეც უნდა აღინიშნოს);
- დ) ერთიან სიაში კენჭისყრის დღემდე რეგისტრირებულ ამომრჩეველთა რაოდენობა;
- ე) კენჭისყრის დღეს რეგისტრირებულ ამომრჩეველთა რაოდენობა;
- ვ) ამომრჩეველთა საერთო რაოდენობა (იგი ტოლია ერთიან სიაში კენჭისყრის დღემდე რეგისტრირებულ ამომრჩეველთა რაოდენობისა და კენჭისყრის დღეს რეგისტრირებულ ამომრჩეველთა რაოდენობის ჯამისა);
- ზ) ამომრჩეველთა რაოდენობა სპეციალურ სიაში;
- თ) ამომრჩეველთა რაოდენობა ამომრჩეველთა სიის დანართში ( გადასატანი ყუთის სიაში);
- ი) არჩევნების მონაწილე ამომრჩეველთა ხელმოწერების რაოდენობა ამომრჩეველთა სიებში 12 და 17 საათზე;
- კ) არჩევნების მონაწილე ამომრჩეველთა საერთო რაოდენობა (ამომრჩეველთა სიებში ხელმოწერების მიხედვით);
- ლ) მიღებული საარჩევნო ბიულეტენების რაოდენობა;
- მ) გამოუყენებელი საარჩევნო ბიულეტენების რაოდენობა;
- ნ) გაფუჭებული საარჩევნო ბიულეტენების რაოდენობა;
- ო) ბათილად მიჩნეული საარჩევნო ბიულეტენების რაოდენობა;
- პ) საარჩევნო სუბიექტების დასახელება, საარჩევნო სუბიექტებისათვის და ყველას წინააღმდეგ მიცემულ ხმათა რაოდენობა;
- ჟ) ნამდვილ ბიულეტენტა რაოდენობა (რაც წარმოადგენს საარჩევნო სუბიექტებისათვის და ყველას წინააღმდეგ მიცემულ ხმათა რაოდენობის ჯამს);
- რ) საუბნო საარჩევნო კომისიის ბეჭდის ნომერი;
- ს) ოქმის დამტკიცების თარიღი და დრო;
- ტ) ოქმის ის მონაცემი, რომლებსაც არ ეთანხმება კომისიის წევრი (ამ ჩანაწერს კომისიის წევრი აკეთებს გრაფაში „განსხვავებული აზრი“ და ხელს აწერს მას);
- უ) ოქმის სარეგისტრაციო ნომერი და რეგისტრაციის თარიღი ( შეივსება ოქმის გაცემისას);

**მუხლი 4.** საუბნო საარჩევნო კომისიის კენჭისყრის შედეგების შემაჯამებელი ოქმის №01 და № 02 ფურცლები, როგორც პროპორციული, ასევე

მაჟორიტარული (კომისიის წევრთა თანდართული განსხვავებული აზრებით) ბიულეტენებისა და ამომრჩეველთა სიების დალუქულ პაკეტთან ერთად დაუყოვნებლივ გადაეცემა ზემდგომ საოლქო საარჩევნო კომისიას, რომელიც ოქმების №01 ფურცლებს (კომისიის წევრთა თანდართული განსხვავებული აზრების ასლებით) დაუყოვნებლივ გადასცემს უსკოს.

**მუხლი 5.** ოქმის №№03-08 ფურცლები დაუყოვნებლივ გადაეცემა საარჩევნო უბანში საუკეთესო შედეგის მქონე ექვსი პარტიის/საარჩევნო ბლოკის/საინიციატივო ჯგუფის წარმომადგენელს, ხოლო №09 და №10 ფურცლები – ორი დამკვირვებელი ორგანიზაციის დამკვირვებლებს (თუ ამ ოქმების მიღების სურვილი მეტმა დამკვირვებელმა გამოთქვა, ეს ორი დამკვირვებელი წილისყრით შეირჩევა). სხვა წარმომადგენლებსა და დამკვირვებლებს კენჭისყრის მომდევნო დღეს, თუ მოითხოვენ, საოლქო საარჩევნო კომისიის მიერ გადაეცემათ საუბნო საარჩევნო კომისიის №02 შემაჯამებელი ოქმის ქსეროასლი, რომელიც მოწმდება საოლქო საარჩევნო კომისიის ბეჭდით და მას ხელს აწერს საოლქო საარჩევნო კომისიის თავმჯდომარე და კომისიის მდივანი (ამ ოქმების იურიდიული ძალა ისეთივეა, როგორიც №№01-10 ოქმებისა). ოქმების მიღებას წარმომადგენელი/დამკვირვებელი საოლქო საარჩევნო კომისიის სარეგისტრაციო ჟურნალში ხელმოწერით ადასტურებს.

**მუხლი 6.** 1. საოლქო საარჩევნო კომისიის კენჭისყრის შედეგების შემაჯამებელ ოქმში აღინიშნება:

- ა) საარჩევნო ოლქის ნომერი და დასახელება;
- ბ) არჩევნების დასახელება;
- გ) კენჭისყრის თარიღი (თუ ეს არის განმეორებითი კენჭისყრა ან არჩევნების მეორე ტური, ესეც უნდა აღინიშნოს);
- დ) ამომრჩეველთა საერთო რაოდენობა საარჩევნო ოლქში;
- ე) არჩევნებში მონაწილეთა საერთო რაოდენობა საარჩევნო ოლქში;
- ვ) მიღებულ საარჩევნო ბიულეტენტა საერთო რაოდენობა;
- ზ) გამოუყენებელ საარჩევნო ბიულეტენტა რაოდენობა;
- თ) გაფუჭებულ საარჩევნო ბიულეტენტა რაოდენობა;
- ი) საარჩევნო სუბიექტთა დასახელებები, საარჩევნო სუბიექტებისა და ყველას წინააღმდეგ მიცემულ ხმათა რაოდენობა;
- ლ) ნამდვილ ბიულეტენტა რაოდენობა (რაც წარმოადგენს საარჩევნო სუბიექტებისათვის და ყველას წინააღმდეგ მიცემულ ხმათა რაოდენობის ჯამს);
- მ) საარჩევნო უბნის ნომერი, რომელშიც საოლქო საარჩევნო კომისიამ ბათილად ცნო კენჭისყრის შედეგები, ამომრჩეველთა საერთო რაოდენობა ამ უბანში და კენჭისყრის ბათილად ცნობის საფუძველი;
- ნ) გაცემულ საარჩევნო ბიულეტენტა რაოდენობა იმ საარჩევნო უბნებში, რომლებშიც კენჭისყრის შედეგები ბათილად იქნა ცნობილი;

- ო) ოქმის დამტკიცების თარიღი და დრო;
- პ) ოქმის ის მონაცემები, რომლებსაც არ ეთანხმება კომისიის წევრი (ამ ჩანაწერს კომისიის წევრი აკეთებს გრაფაში „განსხვავებული აზრი“ და ხელს აწერს მას);
- ჟ) ოქმის სარეგისტრაციო ნომერი და რეგისტრაციის თარიღი ( შეივსება ოქმის გაცემისას).

2. საოლქო საარჩევნო კომისიის არჩევნების შედეგების შემაჯამებელ ოქმში აღინიშნება, ამ მუხლის პირველ პუნქტში ჩამოთვლილი მონაცემები და მათთან ერთად: არჩეული პირის ვინაობა, მეორე ტურში გასულთა ვინაობა, მეორე ტურში არჩეული პირის ვინაობა.

**მუხლი 7.** საოლქო საარჩევნო კომისიის არჩევნების შედეგების შემაჯამებელი ოქმის №01 ფურცელი (კომისიის წევრთა თანდართული განსხვავებული აზრებით), აგრეთვე, საოლქო საარჩევნო კომისიის განკარგულებები საუბნო საარჩევნო კომისიების შემაჯამებელ ოქმებში ცვლილებების შეტანის შესახებ (თუ ასეთი ცვლილება იქნა შეტანილი) დაუყოვნებლივ გადაეცემა უსკოს.

2. საოლქო საარჩევნო კომისიის მიერ არჩევნების შედეგების შეჯამების მომდევნო დღეს საარჩევნო სუბიექტების წარმომადგენლებსა და დამკვირვებლებს, თუ მოითხოვენ, გადაეცემათ საოლქო საარჩევნო კომისიის კუთვნილი შემაჯამებელი ოქმის ( ყდის უკანა ფურცელი) ასლი. შედეგების შეჯამების მომდევნო დღეს გაცემული ყველა შემაჯამებელი ოქმი მოწმდება კომისიის თავმჯდომარისა და მდივნის ხელმოწერებითა და კომისიის ბეჭდით. ოქმის მიღებას წარმომადგენელი/დამკვირვებელი კომისიის სარეგისტრაციო ჟურნალში ხელმოწერით ადასტურებს”.

**მუხლი 8.** აჭარის ავტონომიური რესპუბლიკის უმაღლესი საარჩევნო კომისია აჯამებს არჩევნების შედეგებს და ადგენს:

- ა) ამომრჩეველთა საერთო რაოდენობას;
- ბ) არჩევნებში მონაწილე ამომრჩეველთა რაოდენობას;
- გ) ბათილად მიჩნეულ საარჩევნო ბიულეტენტა რაოდენობას;
- დ) საარჩევნო სუბიექტების მიერ მიღებულ ხმათა რაოდენობას;
- ე) ყველას წინააღმდეგ მიცემულ ხმათა რაოდენობას;

2. არჩევნების საბოლოო შედეგების შემაჯამებელ ოქმში მითითებული უნდა იყოს იმ საარჩევნო ოლქების და უბნების დასახელება და ნომრები, რომლებშიც არჩევნები ბათილად იქნა ცნობილი, აგრეთვე მათში ამომრჩეველთა რაოდენობა, არჩეულ უმაღლესი საბჭოს წევრთა რაოდენობა და ანბანურად დალაგებული მათი სია.

**მუხლი 9.** ეს დადგენილება შეიძლება გასაჩივრდეს აჭარის უმაღლეს სასამართლოში ( მისამართი; ქ.ბათუმი, ჯავახიშვილის ქ. № 5) მისი მიღებიდან 3 კალენდარული დღის ვადაში.

**მუხლი 10.** ეს დადგენილება ძალაში შედის გამოქვეყნებისთანავე.

კომისიის თავმჯდომარე

ი. ფალავა

კომისიის მდივანი

გ. მჭედლიძე